

pere diverso; ab *E. capitulifloro*, caule fruticoso, floribus magnis etc.

**332. Eritrichum cynoglossoides Ph.** E. perenne, incanum; humile; caule pilis appressis vestito, basi ramoso; ramis simplicibus; foliis linearibus, inferioribus basi valde attenuatis, superioribus latioribus, oblongis, omnibus albobispidis; floribus ad apices ramorum in capitula congestis; calyce fulvo-lanato, corollis magnis.

In herb. Chilensi cum *E. capitulifloro* confusum jacebat, ut videtur prope *Arqueros* lectum. — Caulis 5 poll. longus; folia inferiora 10 lin. longa, 1 lin. lata, superiora 5 lin. longa, 1 1/2 lin. lata; calyx fere 1 1/2 lin. longus, diam. corollae 1 3/8 — 2 lin. — Differt ab *E. capitulifloro* foliis superioribus basi latioribus, fere amplexicaulibus, calyce corollaeque duplo majoribus, vellere calycino breviori, magis rigido.

**333. Eritrichum asperum Ph.** E. annuum, ramosum; caule pilis brevibus, patentibus hirsuto; foliis linearibus, alboverrucosis; racemis elongatis, multifloris; calycis parvi tubo setis brevibus aspero, setis in basi laciniarum linearium obtusarum longioribus; corolla satis minuta.

Prope portum *Coquimbo* legi. — Caulis pedalis, folia 9 — 10 lin. longa, 1 1/4 lin. lata; calyx vix 1 1/4 lin. longus, diameter corollae vix 1 1/2 lin.; achaenia minima, pallide fusca, vix tuberculata, punctata. — Ab *E. globulifero* caule haud à basi ramosissimo, calyce minime pilis longis horizontalibus tecto, verrucis albis foliorum, ab *E. subamplexicauli* mihi (Flor. atacam.) foliis superioribus basi haud dilatatis, pilis caulinis brevioribus, calyce floribusque longe minoribus etc. differt.